

PREDRASUDE O MEDRESI

Uprkos tome što je Medresa svojevrsni historijski temelj obrazovanja u Sandžaku i što se od obnove njenog rada prije 30 godina zadivljujući rezultati vide na svakom koraku i u svim porama našeg društva, s vremena na vrijeme se osjeća potreba da Medresa bude glasnjija u promoviranju svojih vrijednosti i zasluga - ne zbog toga što se od nečega mora braniti, već da bi otklonila eventualne nejasnoće koje se mogu javiti u ovom dobu širenja neprovjerenih informacija.

U tu svrhu, dragi čitatelji, predstavljamo vam nekoliko najčešćih predrasuda o Medresi i odgovore na njih.

PRVA PREDRASUDA: “MEDRESA NIJE PRIZNATA ŠKOLA”

Naprotiv, Medresa je priznata i veoma respektovana škola u cijelom okruženju. Studenti koji su završili Medresu se izdvajaju svojim dobrim radnim navikama, redovnošću, predanošću, nauči i širokim opštim obrazovanjem.

Svršenika naše škole ima na svim fakultetima od osnovnih do postdiplomskih studija: u Mekki, Medini, Novom Pazaru, Beogradu, Nišu, Sarajevu, Podgorici, Istanbulu, Beču...

Diploma Medrese je priznata i rado prihvaćena od svih fakulteta, jer svi znaju da diplomu Medrese nose budući marljivi i uzorni studenti.



DRUGA PREDRASUDA: “NE ŽELIM UPISATI MEDRESU JER NE ŽELIM BITI HODŽA”

Prije svega, epiteti “efendija” i “hodža” su najčasniji i treba ih sa ponosom nositi. Ipak, općepoznato je da se poslije završene Medrese otvara cijela paleta mogućnosti studiranja islamskih i svjetovnih fakulteta. Ko želi nastaviti da se bavi društvenim ili prirodnim naukama, to vrlo lahko može učiniti.

Sa druge strane, onome ko želi nastaviti da zajednici služi proučavajući islamske nauke, Medresa je nezaobilazan faktor.

Najbolji, najuzoritiji i najkorisniji članovi našeg društva su završili Medresu. Najveći borci za naš narod i najbolji stručnjaci iz svih oblasti potekli su iz Medresinih klupa. Ne postoji nijedna druga škola koja može ponuditi takve mogućnosti.



TREĆA PREDRASUDA: “MEDRESA JE PREVIŠE STROGA ŠKOLA”



Medresa baštini temeljne postulate naše lijepe vjere. Vjera islam je objavljena da bi ljudi mogli živjeti u harmoniji. Učenici Medrese imaju pregršt vannastavnih aktivnosti i mogućnosti za korisnu razonodu. Ne samo to – učenici Medrese imaju svoj učenički parlament, čiji članovi su samo učenici i čiji glas se veoma respektira od strane profesora. Slobodni su izraziti mišljenja, potrebe i sugestije i uvijek nailaze na razumijevanje.

Naravno, ne treba miješati termin “strogost” sa težnjom Medrese da nijedan učenik ne smije biti potcijenjen, da se mora poštovati pravo svakog učenika i da se, prije svega, sveukupni uspjeh postigne poštivanjem vjerskih principa.

ČETVRTA PREDRASUDA: “DRUGOVI ĆE ME NAPUSTITI AKO UPIŠEM MEDRESU”

Kao prvo, moraš znati da te pravi drug nikada neće napustiti, a naročito ne ako si upisao najbolju školu. Onaj ko ti daje podršku da doneseš ispravnu odluku i nastavi da bude uz tebe – taj ti je pravi drug. Takvo prijateljstvo neće prestati. Evo prijedloga: tog dobrog druga ukoliko je odličan i uzoran učenik,

povedi sa sobom, neka i on upiše Medrese.

I naravno, budi siguran da ćeš u Medresi steći prijateljstva koja traju cijeloga života. Svi koji su završili Medresu su nam to posvjedočili.



PETA PREDRASUDA: “U MEDRESI NEMA IZLETA, EKSKURZIJA I DRUŽENJA”

Svega navedenog ima u izobilju i to je dio obaveznog vannastavnog sadržaja.

Naši učenici s vremena na vrijeme sa svojim razrednim starješinama posjete neku od lokacija u okolini, a nerijetko to bude ekskurzija kroz Bo-

snu, obilazeći najzanimljivija mjesta.

Osim toga, svake godine se organiziraju izleti do okolnih planina, odlazak do primorja, pa čak i višednevna ekskurzija kroz Tursku.



Učenici se, mimo izleta i ekskurzija, okupljaju u okviru raznih sekcija (literarne, umjetničke, informatičke, sportske i druge) i veoma su uspješni na regionalnim takmičenjima iz različitih disciplina.

ŠESTA PREDRASUDA: “JA SAM ODLIČAN UČENIK, PA MI GOVORE DA JE ŠTETA AKO UPIŠEM MEDRESU”

Naprotiv, ako si odličan i uzoran učenik – Medresa je tvoj najlogičniji izbor.

Oni koji te odvrćaju od Medrese vjerovatno ne znaju da je ona suštinski dom znanja, da se u njoj razvijaju svi intelektualni afiniteti: od vjerskih, preko društvenih do prirodno-matematičkih.

Primjera radi, ovaj časopis koji čitaš su napisali i uredili učenici Medrese, a to je samo jedna od mnogih prednosti kojom se nijedna druga škola ne može pohvaliti.



SEDMA PREDRASUDA: “U MEDRESI GASULITE MRTVE”

Čak i da je to istina, nema časnije dužnosti nego služiti vjeri i vjerskim propisima.

Međutim, uprkos čestim provokacijama i neukusnim šalama od strane nekih, u Medresi se ne gasule mejiti. To je posao posebne službe u okviru Islamske zajednice, a nerijetko i imama u lokalnim džematima.

Ono što jeste istina je da učenici u okviru predmeta Fikh (Šerijatsko pravo) na teorijskom nivou proučavaju islamske propise vezane za sve aspekte ljudskog života, a jedan od tih propisa vezan je za postupke prema umrlima.

Kao što je već mnogo puta ponovljeno: Medresa je svestrana škola za svestrane ličnosti.



OSMA PREDRASUDA: “MEDRESA NE PRATI TREND”

Potpitanja ove predrasude glasila bi ovako:

- Zašto muškarci i djevojke moraju biti odvojeni?
- Zašto ne drže časove u istoj zgradi, da bi se mogli družiti?
- Zašto djevojke imaju kodeks oblačenja?
- Zašto u Medresi postoji „kućni red“, itd.

Na sva ova pitanja mi odgovaramo kontrapitanjem na koje niko ne može naći potvrđan odgovor: **Da li se iko ko je završio Medresu pokajao**

zato što je završio Medresu?

Trend nije uvijek koristan pravac kretanja društva. Postoje vrijednosti koje nikada ne mogu izići iz mode, a to su: moral, čvrst karakter, učtivost, radne navike, neporočnost...

Medresa je zadnja brana odbrane društva od nestanka ovih osobina. Ako bi i ta brana popustila (a neće, Allahovom dozvolom) posljedice po društvo bi bile katastrofalne.

Medresa je naučna ustanova, ali i odgojna. Ona je jedina potpuna škola.